



DIARIO
DEPORTIVO


Awe Sport Boys ta cumpli 30 aña

ORANJESTAD (AAN)- Algo mas cu 30 aña pasa un grupo di mayornan di Sero

Compa y vecindario entre otro Bruno Werleman (q.e.p.d.) y

Sr. Fani Rasmijn, preocupa pa e hecho cu nan jiunan tabata hunga futbol ariba caminda publico, a dicidi di uni forza y traha un veld den cunucu di Sr. Bruno Werleman (q.e.p.d.)

caminda e muchanan di e barrio por a practica futbol fuera di peligro.

Dia 24 di Mei 1958 na cas di Sr. Shon Pe Geerman, ta tuma

lugar un reunion durante cual e equipo a keda oficialmente funda y un directiva a worde forma bao presidencia di Sr. Fani Rasmijn.

E equipo tabata tin mester di un number. Justamente e aña ey tabata di bishita na Aruba un equipo di futbol for di Peru, cu tabata hiba e number di Sportboys. Ariba proposicion di Sr. Benny Werleman e equipo nobo a haya mesun number y ta worde jama: S.V. Sport Boys. E colornan oficial di e equipo ta bira oranje cu blauw, cual despues di corto tempo ta worde cambia den blauw cu blanco.

Despues cu e tereno na Sero Compa a resulta chiquito, Sr. Juan Werleman q.e.p.d. a ofrece su tereno na Angochi pa worde converti den un veld di bala. Cu gran labor di e miembronan y cu judanza di LAGO, cu a pone un "grader" disponible, pronto e tereno tabata cla y por a wordo inaugura.

Na aña 1967, bao presidencia di un directiva sumamente dinamico, cu un biaha mas Sr. Fani Rasmijn como presidente, Sport Boys a jega na su propio clubhuis, algo cu masha poco organizacion por a logra.

Durante su existencia, Sportboys a jega di promove varios vez pa e division Mayor di nos futbol. Actualmente e organizacion su promer equipo ta milita den division Promer. Tambe e ta participa cu un equipo den Division reserva y Division Aspirant.

Fuera di futbol, e organizacion ta participa tambe na e campeonato di domino cu un equipo di damas y un di cabayeros.

Diamars, 24 di Mei 1988, Sport Boys ta cumpli 30 aña. Pa recorda e hecho aki, lo bay tin pa 7or awe nochi un santo sacrificio di Misa na Iglesia Immaculata Concepcion na Santa Cruz. Pa 8or lo sigui un recepcion den Sport Boys Club.

Directiva kier a invita tur su miembronan, ex directiva y ex miembronan y demas invitados pa asisti na e sacrificio y despues na recepcion.

Durante e lunanan venidero lo sigui varios torneonan pa recorda e 30 añanan di existencia di SportBoys y mas na final di aña lo honra tur esnan cu pa nan merito ta bin na remarque pa tal.



Diasabra ultimo durante un get to gether ameno na San Luis Liquortique a tuma lugar bautismo di e uniform nobo di San Luis Deportivo/Banco di Caribe. Riba e foto aprecia momento di e acto di bautismo, cu a ser efectua pa sr. Angel Vrolijk, representando San Luis Liquortique. Debi cu e representante di Banco di Caribe pa motibonan imprevisto no por tabata presente, srta. Marouschka de Kort y Ricky Frank, respectivamente madrina y hungador di San Luis Deportivo den presencia di directiva y hungadornan y invitadonan, a bautiza e uniform.